

दिनांक : 29.04.2026

समय : 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेन्द्र मोदी उत्तरप्रदेश मांय हरदोई ऊं गंगा एक्सप्रेस-वे देश ने सूंप्यों इण ऊं सफ़र रो बगत कम व्हेवण सागे सैर-सपाटा ने बधावो अर नुवा माली मौकां ने बधावो मिलेलां
- ग्लोबल राजस्थान एग्रीटेक मीट-ग्राम-2026 रा सिलसिला मांय काल गुजरात रा अहमदाबाद मांय निवेशक समेलण राख्यो जावेलां
- राज्य रा अभ्यारण्यां अर जंगलात हलकां मांय एक मई ऊं वॉटर होल तरीका ऊं जंगली जिनावरां री गिणती करी जावेलां
- प्रदेश मांय पड़ रह्या जोरदार तावड़ा बीचे कठे-कठे आंधी-बारिशं

000

प्रधानमंत्री नरेंद्र मोदी आज उत्तरप्रदेश रा हरदोई ज़िला मांय करीब 594 किलोमीटर लम्बो गंगा एक्सप्रेस-वे देश ने सूंप्यों ई मौके प्रधानमंत्री कह्यो के चोखो बुनियादी ढांचो देश री बरकत री तेज़ रफतार ने बतावे हैं वे कह्यो के ई एक्सप्रेस-वे ऊं सफ़र मांय कम बगत लागेलां आ परियोजना राष्ट्रीय राजधानी हलका मांय मौजूद मौकां ने देश रा न्यारा-न्यारा हलकां रा करीब लावेलां

.....

प्रधानमंत्री कह्यो के 12 ज़िलां ऊं निकळबा वाळा ई एक्सप्रेस-वे मांय हवाई पट्टी ई शामिल हैं शाहजहांपुर री ई हवाई पट्टी ऊं भारतीय वायु सेना रा जंगी जहाज़ां ने मुश्किल बगत मांय उड़ान भरण अर उतरण मांय मदद मिलेलां

000

सुप्रीम कोर्ट शिक्षा का अधिकार कानून रा तैत, स्कूल मांय बच्चों रा दाखिला ने राष्ट्रीय मिशन बताता थकां ज़रूरी बतायो हैं अदालत कह्यो के सरकार री मदद बगैर चाल रही गैर-सरकारी स्कूलां ने पात्र विद्यार्थियां ने बिना मोड़ो कर्यां दाखिलो देवणो पड़ेलां अदालत कह्यो के मुफ्त अर जरूरी भणार्ई-लिखाई तैय करण सारू कानून ने असरदार तरीका ऊं लागू करणो जरूरी हैं

000

राज्यपाल हरिभाऊ बागड़े टाबरियां री भणार्ई-लिखाई ने बधावो देवण माथे जोर दीनो हैं राज्यपाल आज पाली ज़िला रा रोहट मांय गुरुकुल कन्या महाविद्यालय रा हॉस्टल रो नुवो भवन जनता ने सूंपण रे मौके बोल रह्या हां श्री बागड़े कह्यो के लड़कियां ने समाज अर परिवार माथे बोझ मानबा री सोच छोड़बा री ज़रूरत हैं वे कह्यो के टाबरियां री भणार्ई ऊं दो पिरवार पढ़्या-लिख्या बणे हैं

.....

000

मुख्य सचिव वी. श्रीनिवास आज जयपुर मांय अहलकारां सागे शिक्षा विभाग री पीएम श्री स्कूल रैंकिंग अर शाला सम्बलन एप समेत न्यारी-न्यारी योजनावां रा बारा मांय चर्चा कीनीं वे भणार्ई-लिखाई री

गुणवत्ता मांय सुधार सारू डेटा अर तकनीक काम लेवण माथे ज़ोर दीनों मुख्य सचिव अहलकारां ने गांवाई हलकां रो दौरा करण बाबत् ई कहयों  
खबरनवीसां सागे बातचीत करता थकां मुख्य सचिव कहयो के प्रदेश मांय पांच सौ ऊं बत्ती पीएम श्री स्कूलां री जांच करीजी है अर वां ने ई सत्र मांय और बजट दियो जावेलां

000

ग्लोबल राजस्थान एग्रीटेक मीट-ग्राम-2026 रा सिलसिला मांय काल गुजरात रा अहमदाबाद मांय निवेशक सम्मेलण राख्यो जावेलां इण मांय खेती-बाड़ी अर इण ऊं जुड़ी तकनीक, डेयरी अर सहकारिता हलका मांय निवेश अर भागीदारी री संभावनावां रा बारा मांय विचार करयो जावेलां ई दौरान नीति बणावण वाळा, निवेश करण वाळा, स्टार्टअप अर उद्योग जगत रा नुमाइंदा भेळा व्हेलां इण मांय मुख्यमंत्री भजनलाल शर्मा, कृषि मंत्री किरोड़ी लाल मीणा अर पशुपालन मंत्री जोराराम कुमावत रो ई शामिल व्हेवण रो कार्यक्रम हैं

000

राज्य रा पुलिस महकमा मांय 52 डीएसपी रो तबादलो करी ज्यो हैं पुलिस महानिदेशक रा दफ्तर री ओर ऊं पुलिस निरीक्षक ओहदा माथे काम कर रह्या केई अहलकारां री तरक्की व्हे र वां ने डीएसपी ओहदा माथे नुवी ठौड़ ड्यूटी करण रा हुकम जारी करी ज्यो हैं आं ने सी.आई.डी., साइबर क्राइम, एस.ओ.जी., नारकोटिक्स फोर्स अर पुलिस ट्रेनिंग स्कूलां मांय जिम्मेदारियां दीरीजी हैं

000

राज्य मांय एक मई ऊं जंगली जिनावरां री वॉटर होल तरीका ऊं गिणती करी जावेलां लारला दिनां जयपुर मांय अहलकारां अर कर्मचारियां ने इण ऊं जुड़ी सिखावण दीरीजीं पेश है एक रपट-

000

झुंझुनूं जिला मांय खेतड़ी उपखंड रा रामपुरा हलका मांय ज़मीं हेटे दब्योड़ी आठवीं ऊं बारहवीं शताब्दी जूनी सभ्यता रा निशाण मिल्या हैं पुरातत्व अर संग्रहालय विभाग रा अधीक्षक डॉ. विनीत गोधल बतायो के खुदाई मांय शुंग-कुषाण ज़माना री पक्की भींतां, मिन्दर रा खंभा अर टेराकोटा अर लोहा री सामग्री मिली हैं

000

जैसलमेर मांय विधायक छोटू सिंह भाटी आज 50 महिला स्वास्थ्य कार्यकर्तावां ने बैटरी ऊं चालण वाळी स्कूटी दीनीं ई मौके मौजूद जिला कलेक्टर अनुपमा जोरवाल बतायो के आकांक्षी जिला कार्यक्रम रा तैत अ स्कूटियां दीरीजीं वे कहयो के इण ऊं गांवाई हलका मांय स्वास्थ्य ऊं जुड़्या सुबीता और बेहतर तरीका ऊं मुहैया कराया जा सकेलां

000

राजसमंद जिला मांय देवगढ़ रा पी.एम.श्री. केन्द्रीय विद्यालय मांय प्लास्टिक कचरो भेळो करण रो खास कार्यक्रम राख्यो ज्यो ई रा तैत विद्यार्थी वां रा घर ऊं प्लास्टिक कचरां भेळो कर र लायां मेरा कचरा-मेरी जिम्मेदारी रा नारा वाळा ई कार्यक्रम मांय स्वच्छता ब्रांड एम्बेसेडर भावना पालीवाल कचरा ऊं कमाल-वेस्ट टू वंडर री सोच समझाई

000

राज्य मांय पड़ रह्या जोरदार तावड़ा बीचे लारला दो-तीन दिन मांय जयपुर, दौसा अर अलवर समेत कठे-कठे रूक-रूक र हल्की बारिश व्हीं दौसा मांय बिरखा व्हेवण सागे ओळा ई पड़्यां पुरवाई रा असर ऊं केई ठौड़ां पारो 40 डिग्री सेल्सियस ऊं नीचे उतर गयो दूजी कानी चित्तौड़गढ़ मांय सब ऊं बत्तो 43 दशमलव 4 डिग्री सेल्सियस तापमान दर्ज करी ज्यो, हालांकि घणखर ठौड़ां पारो 2 ऊं 4 डिग्री सेल्सियस ताई उतरयो बाड़मेर अर जैसलमेर मांय ई घणी गर्मी रहीं कोटा, फलौदी, श्रीगंगानगर अर हनुमानगढ़ मांय ई उमस भरी गर्मी ऊं घणी परेशानी व्हे रही हैं सवाईमाधोपुर मांय पड़ रह्या जोरदार तावड़ा ने ध्यान राखता थकां आंगनबाड़ी केन्द्रां रा बच्चां सारू टेम संवारे सात ऊं ग्यारह बज्यां ताई कर दियो ज्यो हैं मौसम विभाग राज्य रा लंकाऊ-आतूणी हलका मांय लू बाजती रेहवण री शंका जतायी है, जदके 15 जिलां मांय आंधी चालण सागे छुट-पुट बरसात रा आसार हैं

000

आज विश्व नृत्य दिवस हैं अंतर्राष्ट्रीय नृत्य दिवस रो खास जळसो फिलिपीन्स री राजधानी मनीला मांय राख्यो जा रह्यो हैं दुनियाभर मांय ओ दिन नाच री कला ने मान देवण रा मौका रा तौर ऊं मणायो जावे हैं और ब्यौरो समाचार कक्ष ऊं –

.....

000

जयपुर कने जमवारागढ हलका रा सरजौली गांव मांय प्रशासन पांच अर आठ साल री दो टाबरियां रो ब्याह रुकवा दीनों प्रशासन कानी ऊं बालपणा मांय ब्याह रुकवा देवण री शंका रे कारण घर वाळा तैय तारीख ऊं एक दिन पैली ई ब्याह करावण री तैयारी कर रह्या हा, जिण ने प्रशासन रुकवा दीनों

000

आईपीएल क्रिकेट होड़ रा तैत आज मुंबई इंडियंस अर सनराइजर्स हैदराबाद बीचे मुकाबलो व्हेलां ओ मैच अब ऊं थोड़ी देर पछे साढ़े सात बज्यां मुंबई रा वानखेड़े स्टेडियम मांय सरू व्हेलां अंक तालिका मांय फिलहाल हैदराबाद चौथी अर मुंबई नौवीं ठौड़ माथे हैं

000

केन्द्र सरकार सोशल मीडिया माथे चाल रह्या पेट्रोल अर डीज़ल रा मोल मांय बधोतरी रा हुकम ने फर्जी बतायो हैं पत्र सूचना कार्यालय री फेक्ट चेक इकाई साफ कीनो है के सरकार ऐडो कोई हुकम नी दीनो हैं

000